

Makgamjgaet Yungzanh Bang Vut Gungz

Bi 2019 ndwen 12 ngoenz 27, 2019 ciet vwnzva lijyouz makgamjgaet Yungzanh gaiq daihcib youq Yungzanh Yen Cungguk gungsiuh suen densangh doxgaiq reihnaz Gveiqbaek banh, baez hozdung neix aen cawjdaez dwg “densangh cinjing banggungz bangrengz hwngfat canjnieb”, haenqrengz senhconz gij cingzcik hwngfat makgamjgaet Yungzanh. Hozdung neiyungz baugvat “Gou dwg makgamjgaetvungz Yungzanh” doxdax, suen makgamjgaet cigboq lienzsienq caeuq doxdoeng, canghseng’eiq cunzyawj, dingh mak gangj ndei, yawjngonz suenmak daengj.

Baez hozdung neix, Yungzanh baengh aen seizgei ndei banh ciet vwnzva lijyouz makgamjgaet, comz gij rengz densangh, gyalai doigvangq gaisau gij doxgaiq baenzroix makgamjgaet Yungzanh, daiqdoengh gij doxgaiq miz daegsaek makgamjgaet Yungzanh byaij hwnj aen daizheiq hung, byaij coh seiqgyaiq, mboujduenh gyalai gij mingzdaeuz makgamjgaet Yungzanh.

(Danz Gaijhing Vei Gangh/谭凯兴 卫纲)



▲Aen haimuqsik ciet vwnzva lijyouz.

Liujcwngz: Bae Mbanj Yienjheiq

Bi 2019 ndwen 12 ngoenz 23, Liujcwngz Yen youq Cailungz Cin banh aen hozdung seizdaih moq vwnzmingz saedguh cungsim “vwnzva banggungz bae yanghcin”. Ndaej daengz Yenveij Senhconzbu, Yen Vwnzlijgiz daengj bouhmonz cujciz, gyoengq bouxgagnyienh yienjheiq Liujcwngz Si Yisuz Heiqyienh, Yen Vwnzva’ gvanj yungh banhaemh bae segih, sonyinx bouxyienj yanghcin baizlien yienjheiq, caemhcai banh caijdiu, Heiqgvangjsih daengj cienciengz yienjheiq, vih vunzlai dangdieg yienj ciengz heiq ndeiyawj ndeu. Ciuq cam rox, bi 2019 doxdaeuj, Liujcwngz Yen mizgven bouhmonz haiguh gij hozdung vwnzva banggungz hingzvik lai yiengh haenx, sonyinx vunzlai gaenxmaenx hwnjguh mbanjranz, vih vut gungz gunggeng bangrengz, cauh’ok gij heiqfaenh ndawbiengz ndei.



▲Bouxyienj cingq yienjheiq.

(Dwng Gwzyi/邓克轶)

Lozcwngz: “Bak Fuk” Coux Bimoq



▲Lwgnyez langhbaij cih “fuk” bonjfaenh raiz haenx.

Bi 2019 ndwen 12 ngoenz 30, Lozcwngz Mulajucz Swciyen Daihngaih Youwzyenz banh aen hozdung bae hagdangz raiz sawmauzbit, gaenxmaenx swncienz fatyengz gij vwnzva conzdungj maenhndei Cunghvaz minzcuz, angqcoux yenzdan, ndwencieng yaek daeujaengz haenx.

(Mungz Cwngh-swh/蒙增师)



▲Mehdajsiuq fwngzmbaeu siuq va.

Sanhgyangh: “Byai Fwngz Demsou” Coi Vut Gungz

Bi 2019 ndwen 12 ngoenz 26, youq aen diengz hong fwngz mehmbwk Duncuz Sanhgyangh Duncuz Swciyen Duzdung Cin Dangzcauz Cunh gyoengq mehdajsiuq cingq nyaengq dajsiuq, vih guhsat gij dinghdan gaxgonq ciep haenx gyaban guhhong. Bi 2019 Cungguk Gimqdoeg Gihginhvei caeuq Aen Hozcozse Vunzmbanj Dangzcauz Cunh gya ciem habdoengz, soucawx gij siuq fwngzguh Duncuz dij 60 fanh maenz, daiqdoengh 42 boux mehmbwk ranzgungzhoj louz mbanj caeuqfaenh guh siuq. Ciuq cam rox, Sanhgyangh Duncuz Swciyen Duzdung Cin Dangzcauz Cunh laebdin gij cingzgyang aen cunh, cauhlaeb “aen diengz hong fwngz mehmbwk Duncuz”, sonyinx mehmbwk louz mbanj doxcaez guh siuq. Ginggvaq suhgi daih’it capyouq mbanj lienzhaeh, ciep ndaej dinghdan cawx siuq, gyalai roenloh gai siuq; hwngfat gij canjnieb vut gungz miz daegsaek, hawj mehmbwk louz mbanj ndaej hwngfat, daiqdoengh Mhembwk youq ranz cauhnieb, ndaej goq ranz, cienz dinfwngz, vut gungz “sam mbouj nguh”.

(Gunj Yicungh/滚亿忠)